



### Հայ Կաթողիկե Եկեղեցու հասարակայնության հետ կապերի բաժին

*Պարզաբանում 2015թ. Փետրվարի 11-ին [www.hetq.am](http://www.hetq.am) կայքում «Կրոնակա՞ն, թե՞ ազգային խնդիր Ջավախքում. ուկրաինացի հոգևորականը թաղման նախօրեին փակել է գյուղի եկեղեցին» (լր. Քրիստինե Աղալարյան) վերտառությամբ հրապարակման մեջ արծարծվող խնդրի առնչությամբ*

Վրաստանի Ախալցխի տարածաշրջանի հայ կաթողիկե գյուղերը (այդ թվում և Ծղալթթիլան կամ Նորշենը), որոնք ձևավորվեցին Արևմտյան Հայաստանից զաղթած հայությամբ, պահպանեցին ու ծաղկեցրին իրենց պապերից ժառանգած կաթողիկե դավանանքը: Խորհրդային ռեժիմի տարիներին, երբ Հայաստանում փակվեցին բոլոր կաթողիկե եկեղեցիներն ու արգելվեց Հայ Կաթողիկե Եկեղեցու գործունեությունը, նույնը տեղի ունեցավ նաև Վրաստանում: Սակայն հայ կաթողիկեները, հակառակ ճնշումներին, մշտապես վառ պահեցին իրենց հավատքի ջահն ու սերտ կապը կաթողիկե նվիրապետության հետ: Հոգևոր կարիքների բավարարման փափագը ստիպում էր նրանց հասնել Թբիլիսի և եկեղեցական խորհուրդները ստանալ լատին եկեղեցում: Քանի որ հայ կաթողիկե հոգևորականների ծառայությունը խորհրդային տարածաշրջանում արգելված էր ընդհուպ մինչև 1991թ., 1987թ. Հոմաի Սուրբ Աթոռը վիրահայ կաթողիկե Մխվիլիսի (Սուխվիս), Ծղալթթիլա և հարակից մի քանի այլ գյուղերի հոգևոր պահանջները բավարարելու նպատակով ուղարկեց ազգությամբ լեհ Հ. Հովսեփ վարդապետ Կոռնաշևսկուն, ով կարճ ժամանակում յուրացրեց հայ եկեղեցական ծիսակարգը և խորհուրդները մատակարարում էր ըստ հայ եկեղեցական ծիսակարգի: 1990թ. իրենց գյուղում մշտապես քահանա ունենալու ցանկությամբ ծղալթթիլացիների մի խումբ մեկնեց Ռիգա և կարդինալ Վալվոցին խնդրեց մի վարդապետ ուղարկել Ծղալթթիլա: Երկար ու համառ խնդրանքներին կարդինալն ընդառաջեց և նույն թվականին Ծղալթթիլա ուղարկեց ազգությամբ ուկրաինացի Հ. Անատոլի վարդապետ Իվանյուկին: Հ. Անատոլին առավել մեծ սիրով ու հարգանքով յուրացրեց հայերենը, հայկական ծիսակարգը, հայ եկեղեցական շարականները, պատմությունը՝ հաճախակի դասեր առնելով նաև Մխիթարյան միաբանության հայրերից: Հ. Անատոլին Հայ Կաթողիկե Եկեղեցում հայ ծեսը, մշակույթը և պատմությունը իմացող և գնահատող լավագույն հոգևորականներից մեկն է: 25 տարի անխոնջ ծառայել է Ծղալթթիլայի հոգևոր վերելքի համար՝ կանոնավոր կերպով կատարելով հայկական ծիսակարգը, ըստ կանոնական և բարոյական անհրաժեշտության: Գյուղի եկեղեցին մշտապես լի է եղել և այսօր էլ լի է բարեպաշտ գյուղացիներով: Հ. Անատոլիի հովվական օրինակը ոգեշնչման աղբյուր է հանդիսացել նույն գյուղում քահանայական կոչումների և վանական կյանքին նվիրման համար: Հայ Կաթողիկե Եկեղեցու տարբեր համայնքներում այժմ ծառայում է ծնունդով Ծղալթթիլայից 3 վարդապետ (Հ. Պետրոս վրդ. Պետրոսյան, Հ. Հովսեփ վրդ. Մելիքսեթյան, Հ. Սերգեյ վրդ. Բաբաջանյան) և Մալեգյան միաբանության անդամ 6 միանձնուհի, ինչը խոսում է Հ. Անատոլիի առավել քան պտղաբեր և օրինակելի հոգևոր ծառայության և նվիրման մասին:



Ի նկատի ունենալով Հ. Անատոլիի քաջածանոթ հարգանքը հայ ժողովրդի և հայոց պատմության նվիրական էջերի հանդեպ, ընդգծում ենք, որ նա չէր կարող նման վերաբերմունք ունենալ Հայոց Ցեղասպանության զոհերի նկատմամբ կամ թուրքերին գերադասել հայերից նման արտահայտությունները, որոնք հարցազրույցի ժամանակ թույլ է տվել Վիկտոր Հովհաննիսյանը (և ոչ բոլոր համայնականները), բացարձակ սուտ է: Հ. Անատոլին չէր կարող նաև թշնամանք սերմանել հայ ժողովրդի հոգևոր սրբավայր Սբ. Էջմիածնի հանդեպ (ծղալթբիլացի երիտասարդների համար Հ. Անատոլին բազմաթիվ ուխտագնացություններ է կազմակերպել դեպի Սբ. Էջմիածին և այլ վանքեր) կամ Հայ Առաքելական Քույր Եկեղեցու և Ամենայն Հայոց Կաթողիկոսի հանդեպ: Հայ Կաթողիկե և Հայ Առաքելական Եկեղեցիները մշտապես ջերմ և կառուցողական հարաբերություններ են ունեցել և ունեն մինչ օրս ոչ միայն բարձրաստիճան հոգևորականների, այլև առանձին համայնքներում ծառայող հոգևորականների մակարդակով: Դավանական ինքնության մասին խոսելը կամ դավանական ինքնությանը հավատարիմ մնալու մասին քարոզելը չի նշանակում քար շարտել քույր Եկեղեցու բակը: Ուստի կայքին հարցազրույց տված անձը միտումնավոր, անձնական նկրտումներից դրդված խեղաթյուրում է Հ. Անատոլիի դիրքորոշումն ու խոսքերը, ինչի մասին, վստահ ենք, կվկայի նաև ծղալթբիլացիների մեծամասնությունը, նրանց կարծիքները բարեխղճորեն և անկողմնապահությամբ ճշտելու պարագայում: Տարօրինակ ենք համարում, որ Հ. Անատոլիին զրպարտող կամ չհասկացող մի փոքրիկ խումբ ծղալթբիլացիներ իրենք իրենց Եկեղեցու և ազգի ավելի մեծ նվիրյալներ են համարում և մոռանում են կամ չեն հասկացել Պողոս առաքյալի հետևյալ խոսքերը: «Խտրութիւն չկա ոչ հրեայի եւ ոչ հեթանոսի... որովհետեւ դուք ամենքդ մէկ էք ի Քրիստոս Յիսուս» (Գղ., 3:28): Քրիստոսին քարոզողների համար ազգային խտրականությունն ընդունելի չէ ոչ միայն Հայ Կաթողիկե, այլև Հայ Առաքելական Եկեղեցու: Աստծո կողմից ուղարկված յուրաքանչյուր մշակ հավատացյալների կողմից պետք է ընդունվի որպես Աստծո առաքյալ և սպասավոր, ով իրավունք ունի հորդորելու, հանդիմանելու՝ ի շահ ողջ Եկեղեցու: «Եւ դու քարոզի՛ր Աստծու խոսքը... յանդիմանի՛ր, սաստի՛ր, յորդորի՛ր՝ կատարեալ համբերատարութեամբ...» (Բ Տիմ., 4:2): Իսկ եթե ոմանք հորդորը ընդունում են որպես անձնական թշնամանքի արտահայտություն՝ իրենց հպարտության պատճառով չընդունելով խրատը, դա վկայում է նրանց հավատքի թերության մասին:

Անդրադառնանք բուն դեպքին: Ննջեցյալ Սարգիս Հովհաննիսյանի որդին խնդրել է Հ. Անատոլիին կատարել իր հոր հուղարկավորության կարգը, Հ. Անատոլին սիրով համաձայնել է կատարել կարգը: Բայց, քանի որ Սարգիս Հովհաննիսյանի եղբայր Վ. Հովհաննիսյանը անձնական հակակրանք ունի Հ. Անատոլիի հանդեպ, խնդրել է Հայաստանի, Վրաստանի, Ռուսաստանի և Արևելյան Եվրոպայի հայ կաթողիկեների առաջնորդ Գերշն. Տ. Ռաֆայել Արքեպս. Մինասյանին ուրիշ հոգևորական ուղարկել իր եղբոր հուղարկավորությունը կատարելու համար՝ նշելով իրենց նախընտրած քահանայի անունը: Սրբազան հայրը, ընդառաջելով ննջեցյալի հարազատների խնդրանքին և խորհրդակցելով Հ. Անատոլիի հետ, ծիսակարգը կատարելու համար Ծղալթբիլա է ուղարկել հարևան գյուղերում սպասավորող մեկ այլ հոգևորականի: Բայց Վ. Հովհաննիսյանը հոխորտացել է, թե եթե իրենց նախընտրած քահանան չկատարի թաղման կարգը, իրենք քահանա կիրավիրեն Առաքելական Եկեղեցուց: Շատ հստակ է, որ նման ինքնազուլի վերաբերմունքի իրավունք չունի Վ. Հովհաննիսյանը կամ այդ համայնքի ցանկացած այլ բնակիչ, քանի որ եկեղեցական արարողությունների կատարման կարգը և կատարող քահանայի անձը որոշողը ոչ թե համայնքի աշխարհական անդամն է, այլ՝ համայնքի քահանան և քահանայի վերադասը՝ թեմակալ առաջնորդ եպիսկոպոսը, այս դեպքում Հ. Անատոլին և Գերշն. Տ. Ռաֆայել Արքեպս. Մինասյանը (և ոչ թե



Մխիթարյան միաբանությունը, ինչպես ակնարկում է, կամ ինչպես կուզեր, որ լիներ, Վ. Հովհաննիսյանը): Այդ պատճառով, Հ. Անատոլին թույլ չի տվել թեմի առաջնորդի և իր կողմից առաջարկված հոգևորականին կատարել թաղման կարգը և բացել եկեղեցին, քանի որ հարազատներից մի քանիսը իրենց քահանայքներով վիրավորել են Եկեղեցուն, անարգել թեմի առաջնորդին և Հ. Անատոլին, անհարգալից վերաբերմունք ցուցաբերել եկեղեցական կանոնների նկատմամբ: Հետևաբար, աղոթատան փակ լինելը, որի մասին շեշտվում է հրապարակման մեջ, արդարացի հանդիմանության, հայրական խրատի արտահայտություն է և ոչ թե արհամարհանք կամ մարդատեսացության: Եկեղեցու դուռը փակելը չի հակասում եկեղեցական կանոններին: Ակնհայտ է, որ արհամարհանքի վերաբերմունք ունեցել են մի խումբ ինքնազուխ գյուղացիները և ոչ թե 25 տարի նրանց համար ծառայած վարդապետը, ով երբեք չի մերժել համայնքի և ոչ մի բնակչի օրինական ու պարկեշտ խնդրանքը կամ պահանջը: Հ. Անատոլիի հանդեպ ասված բոլոր անպատվության խոսքերը գրպարտություն են և սոցիալական, թերի հավատքի ու Եկեղեցու մասին աղճատված պատկերացումների, սուբյեկտիվ ընկալումների, նախապաշարումների կամ այլ տրամադրվածության հետևանք:

Բոլոր եկեղեցիներում էլ ընդունում կամ անարգում են իրենց անխոնջ ծառայող անձանց, բայց անկախ դրանից Տիրոջ խաչը կրելը պատիվ ու պարծանք է ոչ թե հանուն մի խումբ պատեհապաշտների, այլ՝ հանուն Քրիստոսի և Եկեղեցու:

*«Երանի՛ է՛ ձեզ, երանի՛ է՛ ձեզ, երբ որ մարդիկ ձեզ ատեն եւ երբ որ ձեզ մերժեն եւ նախատեն ու մարդու Որդու պատճառով ձեր մասին չար անուն հանեն: Ուրախացէ՛ք այդ օրը եւ ցնծացէ՛ք որովհետեւ ձեր վարձը մեծ է երկնքում».* (Ղկ., 6:22):

**Հայ Կաթողիկէ Եկեղեցու հասարակայնության հետ կապերի բաժին**